


Īsā Masīh ko Pānā



īsā masīh ko pānā

Finding Isa Masih

by Bakhtullah

[*Ao, Khud Dekh Lo 14*]

(Urdu—Roman script)

© 2023 www.chashmamedia.org

published and printed by

Good Word, New Delhi

The title cover is a collage of 3209107
<https://pixabay.com/illustrations/vintage-old-used-paper-texture-1659117/>; Rev. H. Martin
<https://freebibleimages.org/illustrations/hm-walking-water/>.

Bible quotations are from UGV.

for enquiries or to request more copies:
askandanswer786@gmail.com

Fahrist

Duniyā kī Soch Chhoṛ Do	4
Ḳhudā Bāp kī Marzī Karo	5
Jān Lo Ki Masīh Sharīat se Bartar Hai	8
Jān Lo Ki Masīh Ḳhudā kā Bhejā Huā Hai	10
Tab hī Masīh ko Pāoge	13
Injīl, Yūhannā 7:1-36	14

► *Ham Īsā Masīh ko kis tarah pā sakte haiñ?*

Ham Muġhal bādshāh Akbar ke bāre meñ bahut kuchh paṛh sakte haiñ. To bhī ham use kabhī nahīn pā sakte.

► *Kyon?*

Wuh to gayā-guzarā hai. Isī tarah ham Īsā Masīh ke bāre meñ bahut kuchh paṛh sakte haiñ.

► *Lekin kyā ham use pā bhī sakte haiñ?*

Injīl sharīf farmātī hai ki ham use pā bhī sakte haiñ. Use pāne se hī hameñ najāt miltī hai.

► *To sawāl yih hai, kyā mainne use pā liyā hai? Kyā wuh mere dil meñ bastā hai? Kyā merā us ke sāth shaḡhsī tālluq hai? Agar nahīn to main use kis tarah pāūn?*

Ab ham is sawāl par dhyān deñge.

Ḳhudāwand Īsā kā kirdār anokhā thā. Uskī tālīm sunkar log hakkā-bakkā rah jāte the. Us se qism qism ke marīzoñ ko shafā bhī miltī thī. Kyā ajab ki wuh bhīroñ se ghirā rahtā thā. Lekin kuchh log uskī tālīm aur mojize bardāsht nahīn kar sakte the. Ḳhāskar Yarūshalam ke mazhabī rāhnumā us se jalte the. Jald hī wuh use pakarṇe kī sāzishēñ karne lage. Īsā Masīh yih jāntā thā. Islie wuh kāfī der tak Yarūshalam se dūr Galīl meñ Ḳhidmat kartā rahā.

Tab Jhoñparīyoñ kī baṛī Īd qarīb āī. Ḳhudāwand Īsā ke ghar wāloñ ne kahā, “Yih jagah chhoṛkar Yahūdiyā chalā jā tāki tere pairokār bhī wuh mojize dekh leñ jo tū kartā hai. Jo shaḲhs chāhtā hai ki awām use jāne wuh poshīdagī meñ kām nahīn kartā. Agar tū is qism kā mojizānā kām kartā hai to apne āpko duniyā par zāhir kar.”

► *Yih log kyā chāhte the?*

Yahūdiyā meñ Yarūshalam thā. Wuh ḵhush nahīñ the ki Īsā Masīh Yarūshalam se dūr ḵhidmat kar rahā hai.

► *Kyon?*

Yarūshalam Yahūdī imān kā markaz thā. Wuh chāhte the ki Īsā Masīh apne mojize wahīñ kar dikhāe jahāñ sab baḗe log īd ke mauqe par jamā hoñge.

► *Kyā un kī yih soch ṭhīk nahīñ thī?*

Nahīñ. Un kī soch siyāsī thī. Unhoñ ne Masīh ke mojize dekhkar ḡhalat natījā nikālā thā. Wuh samajhte the ki ab waqt ā gayā hai ki Īsā Masīh mojize dikhākar Isrāīl kā duniyāwī bādshāh ban jāe. Aur is ke lie zarūrī thā ki wuh Yarūshalam meñ hī apne mojize dikhāe. Wuh poshīdagī meñ yāñī Yarūshalam se dūr kām na kare.

► *Kyā wuh sachmuch poshīdagī meñ kām kar rahā thā?*

Bilkul nahīn. Galīl meñ us ke mojizoñ aur tālīm se bahut logoñ kī zindagī badal rahī thī. Unheñ jismānī aur rūhānī taraqqī mil rahī thī. Aisī poshīdagī to ṭhīk hī hai. Iskā duniyāwī hukūmat se kyā wāstā? Lekin us ke ghar wāle yih bāteñ nahīn samajhte the. Wuh us se sirf duniyāwī fāydā uṭhānā chāhte the.

Īsā Masīh ke jawāb se ham bahut kuchh sīkh sakte haiñ. Pahlī bāt,

Duniyā kī Soch Chhor Do

Ḳhudāwand Īsā ne unheñ batāyā,

Abhī wuh waqt nahīn āyā jo mere lie mauzūñ hai. (Yūhannā 7:6)

► *Mauzūñ waqt kā kyā matlab hai?*

Īsā Masīh hameshā Ḳhudā Bāp kī marzī ke mutābiq chaltā thā. Us waqt Ḳhudā Bāp nahīn chāhtā thā ki wuh jāe.

Us ne farmāyā,

Lekin tum jā sakte ho, tumhāre lie har waqt mauzūn hai. Duniyā tum se dushmanī nahīn rakh saktī. Lekin mujh se wuh dushmanī rakhtī hai. (Yūhannā 7:6-7)

Us ke ghar wāle duniyāwī soch rakhte the. Wuh khyāl hī nahīn karte the ki Ҡhudā kī marzī kyā hai. Islie un ke lie har waqt mauzūn thā. Islie duniyā un se dushmanī nahīn rakhtī thī. Wuh Ҡhudāwand Īsā se dushmanī rakhtī thī kyonki uskī soch farq thī.

► *Kyā āp Īsā Masīh ko pānā chāhte hain?*
Duniyāwī soch chhoṛ do. Dūsri bāt,

Ҡhudā Bāp kī Marzī Karo

Ghar wāle id manāne Yarūshalam chale gae. Lekin kuchh der bād Īsā Masīh ko Ҡhudā Bāp se hidāyat milī ki wuh id par jāe. Tab wuh chupke se rawānā huā.

Yarūshalam meñ Yahūdī rāhnumā pahle se uskī tāk meñ baiṭhe the. Buṛbuṛā rahe the, “Wuh ādmī

kahān hai?” Ām log bhī āpas meñ phusphusā rahe the. Kuchh us ke haq meñ the, kuchh us ke k̄hilāf. Lekin koī khulkar bāt nahīn kar rahā thā kyoñki sab Yahūdī rāhnumāoñ se ḍarte the.

Īd kā ādhā hissā guzar chukā thā to Īsā Masīh Baitul-muqaddas meñ jākar tālīm dene lagā. Use sunkar log hairatzadā hue.

► *Kyoñ?*

Unhoñ ne kahā, “Yih ādmī kis tarah itnā ilm rakhtā hai hālāñki is ne kahīn se bhī tālīm hāsīl nahīn kī!”

► *Ḳhudāwand Īsā ne jawāb meñ kyā kahā?*

Jo tālīm main detā hūñ wuh merī apnī nahīn balki uskī hai jis ne mujhe bhejā. (Yūhannā 7:16)

► *Kis ne use bhejā thā?*

Ḳhudā Bāp ne use bhejā thā. Yih kitāboñ se raṭī-raṭāī tālīm nahīn thī. Yih to sīdhe Ḳhudā Bāp se milī tālīm thī. Īsā Masīh sirf wuh kuchh farmātā aur kartā hai jo Ḳhudā Bāp kī marzī hai.

Ab us ne ek aur chaunkā dene wālī bāt farmāi,

Jo uskī marzī pūrī karne ke lie taiyār hai wuh jān legā ki merī tālīm Allāh kī taraf se hai. (Yūhannā 7:17)

Īsā Masīh kī tālīm Ḳhudā kī taraf se hai.

► *Ham yih kis tarah jān sakte haiñ?*

Ḳhudā kī marzī karne se. Jo Ḳhudā kī marzī karne ke lie taiyār rahtā hai wuh ekdam jān letā hai ki Īsā Masīh kī tālīm Ḳhudā kī taraf se hai. Yih dushman Ḳhudā kī marzī karne ko taiyār nahīñ the islie wuh rūhānī taur se andhe the. Wuh bas apnī izzat ke pīchhe paṛe rahte the. Islie Īsā Masīh ne farmāyā,

Jo apnī taraf se boltā hai wuh apnī hī izzat chāhtā hai. Lekin jo apne bhejne wāle kī izzat-o-jalāl baṛhāne kī koshish kartā hai wuh sachchā hai aur us meñ nārāstī nahīñ hai. (Yūhannā 7:18)

- ▶ *Kyā āp Ḳhudā kī marzī karne ko taiyār rahte haiñ? Kyā āp apnī zindagī se uskī izzat kar rahe haiñ? Tab hī āp Īsā Masīh ko pā sakte haiñ. Tīsri bāt,*

Jān Lo Ki Masīh Sharīat se Bartar Hai

- ▶ *To yih dushman kis nāte se Ḳhudā kī marzī karne ko taiyār nahīñ the? Ab Ḳhudāwand Īsā ne iskā jawāb diyā. Us ne farmāyā,*

Kyā Mūsā ne tum ko sharīat nahīñ dī? To phir tum mujhe qatl karne kī koshish kyon kar rahe ho?
(Yūhannā 7:19)

- ▶ *Kyā sharīat qatl karne kī ijāzat detī hai? Hargiz nahīñ. To bhī dushman use qatl karne kī koshish kar rahe the. Wuh Ḳhudā kī marzī nahīñ kar rahe the. Islie wuh sachche nahīñ the. Islie wuh pahchān nahīñ sakte the ki Ḳhudāwand Īsā al-Masīh hai. Sirf sachchā dil use pahchān saktā hai.*

Sunane wāloñ ne kahā, “Tum kisī badrūh kī girift meñ ho. Kaun tumheñ qatl karne kī koshish kar rahā hai?” Hālāñki kam-se-kam rāhnumā zarūr use qatl karne kī koshish kar rahe the.

► *Wuh kyon use qatl karnā chāhte the?*

Kuchh mahīnoñ pahle us ne Yarūshalam meñ ek māzūr ādmī ko Sabat ke din shafā dī thī. Yahūdī rāhnumā jalkar use qatl karne kī sāzishēñ karne lage the. Īsā Masīh ne farmāyā,

Maiñne Sabat ke din ek hī mojjizā kiyā aur tum sab hairatzadā hue. Lekin tum bhī Sabat ke din kām karte ho. Tum us din apne bachchoñ kā ḡhatnā karwāte ho. Aur yih rasm Mūsā kī shariāt ke mutābiq hī hai ... Kyonki shariāt ke mutābiq lāzim hai ki bachche kā ḡhatnā āḡhweñ din karwāyā jāe, aur agar yih din Sabat ho to tum phir bhī apne bachche kā ḡhatnā karwāte ho tāki shariāt kī ḡhilāfwarzī na ho jāe. To phir tum

mujh se kyon nārāz ho ki mainne Sabat ke din ek ādmī ke pūre jism ko shafā dī? (Yūhannā 7:21-23)

Yahūdī ustād ꣳhud kahte the ki kuchh kām Sabat ke din kie jā sakte haiñ. ꣳhatnā ek aisā kām thā. Ab ꣳhatnā ek chhoṭā-sā kām hai, aur us se insān bahāl nahīñ hotā. Is kī nisbat ꣳhudāwand Īsā ne māzūr insān ko rūhānī aur jismānī taur par bahāl kiyā thā. ꣳhatnā insān ko bahāl nahīñ kar saktā magar Īsā Masīh yih kar saktā hai. Sharīat insān ko batātī hai ki use kyā karnā hai. Lekin wuh use bahāl nahīñ kar saktī. Isī lie Īsā Masīh duniyā meñ āyā.

► *Kyā āp use pānā chāhte haiñ?*

Jān lo ki wuh sharīat se bartar hai. Chauthī bāt,

Jān Lo Ki Masīh ꣳhudā kā Bhejā Huā Hai

Māzūr kī shafā kā zikr sunte hī Yarūshalam ke kuchh rahne wāle kahne lage, “Kyā yih wuh ādmī nahīñ hai jise log qatl karne kī koshish kar rahe haiñ? Tāham wuh yahāñ khulkar bāt kar rahā hai

aur koī bhī use rokne kī koshish nahīn kar rahā. Kyā hamāre rāhnumāon ne haqīqat meñ jān liyā hai ki yih Masīh hai?”

Lekin phir unhoñ ne khud hī yih khyāl rad kiyā: “Jab Masīh āegā to kisī ko bhī mālūm nahīn hogā ki wuh kahān se hai. Yih ādmī farq hai. Ham to jānte haiñ ki yih kahān se hai.”

► *Wuh kyon sochte the ki jab Masīh āegā to kisī ko bhī mālūm nahīn hogā ki wuh kahān se hai?*

Yahūdiyon meñ yih khyāl phail gayā thā ki al-Masīh poshīdagī meñ āegā aur sirf qaum ko chhuṛāte waqt zāhir ho jāegā. Is binā par log kah rahe the ki ham is bande ko jānte haiñ. Wuh to Galīl se hai. Lihāzā yih al-Masīh ho hī nahīn saktā. Ab dekho ki un se kitnī baṛī ghalatī ho rahī thī. Na wuh Īsā Masīh ko jānte the, na yih ki wuh haqīqat meñ kahān se āyā hai. Īsā Masīh ne farmāyā,

Tum mujhe jānte ho aur yih bhī jānte ho ki main kahān se hūn.

Lekin main apnī taraf se nahīn āyā. Jis ne mujhe bhejā hai wuh sachchā hai aur use tum nahīn jānte. Lekin main use jāntā hūn, kyonki main uskī taraf se hūn aur us ne mujhe bhejā hai. (Yūhannā 7:28-29)

- *Īsā Masīh apne bāre meñ kyā kah rahā thā?*
Achchhā, tum jānte ho ki main kahān se hūn? Haqīqat meñ tum mujhe nahīn jānte. Kyonki mujhe Ḳhudā Bāp se bhejā gayā hai jo tum nahīn jānte.

Yih log is par faḡhr karte the ki hameñ Mūsā se shariyat milī hai aur islie ham sachche Ḳhudā ko jānte haiñ. Lekin is meñ un se ḡhalatī ho rahī thī. Wuh andhe the. Wuh nahīn jānte the ki Īsā Masīh najāt dene āyā hai. Kitne afsos kī bāt.

- *Mere dost, kyā āp Ḳhudā kī qurbat ke lie taraste haiñ? Kyā āp uskī nazar meñ mañzūr honā chāhte haiñ?*

Phir us par imān lāo jise Ḳhudā Bāp ne bhejā hai. Īsā Masīh par. Āḡhirī bāt,

Tab hī Masīh ko Pāoge

Jab rāhnumāon ne dekhā ki hujūm meñ aisī bāteñ ho rahī haiñ to unhoñ ne Baitul-muqaddas ke pahredār Ḳhudāwand Īsā ko pakaṛne ke lie bheje. Lekin Īsā Masīh ne kahā,

Mainī sirf thoṛī der aur tumhāre sāth rahūngā, phir mainī us ke pās wāpas chalā jāūngā jis ne mujhe bhejā hai. Us waqt tum mujhe ḍhūṇḍoge magar nahīñ pāoge, kyonki jahāñ mainī hūñ wahāñ tum nahīñ ā sakte.

(Yūhannā 7:33-34)

► *Wuh kyā kahnā chāhtā hai?*

Thoṛī der bād mainī Ḳhudā Bāp ke pās wāpas lauṭūngā. Tab tum mujhe ḍhūṇḍoge magar nahīñ pāoge.

► *Kyon?*

- Wuh duniyā kī soch rakhte the.
- Wuh Ḳhudā Bāp kī marzī nahīñ karte the.
- Wuh nahīñ pahchānte the ki Masīh meñ ek āyā hai jo shariyat se bartar hai.

- Wuh nahīn pahchānte the ki Masīh Ḳhudā kā bhejā huā hai.
- *Kyā āpne use pā liyā hai?*

Injīl, Yūhannā 7:1-36

Is ke bād Īsā ne Galīl ke ilāqe meñ idhar-udhar safr kiyā. Wuh Yahūdiyā meñ phirnā nahīn chāhtā thā kyonki wahān ke Yahūdī use qatl karne kā mauqā ḍhūnḍ rahe the. Lekin jab Yahūdī īd banām Jhoñpariyon kī Īd qarīb āi to us ke bhāiyon ne us se kahā, “Yih jagah chhoṛkar Yahūdiyā chalā jā tāki tere pairokār bhī wuh mojize dekh leñ jo tū kartā hai. Jo shaḳhs chāhtā hai ki awām use jāne wuh poshīdagī meñ kām nahīn kartā. Agar tū is qism kā mojjizānā kām kartā hai to apne āpko duniyā par zāhir kar.” (Asl meñ Īsā ke bhāi bhī us par īmān nahīn rakhte the.)

Īsā ne unheñ batāyā, “Abhī wuh waqt nahīñ āyā jo mere lie mauzūñ hai. Lekin tum jā sakte ho, tumhāre lie har waqt mauzūñ hai. Duniyā tum se dushmanī nahīñ rakh saktī. Lekin mujh se wuh dushmanī rakhtī hai, kyoñki main us ke bāre meñ yih gawāhī detā hūñ ki us ke kām bure haiñ. Tum khud id par jāo. Main nahīñ jāūngā, kyoñki abhī wuh waqt nahīñ āyā jo mere lie mauzūñ hai.” Yih kahkar wuh Galil meñ thahrā rahā.

Lekin bād meñ, jab us ke bhāī id par jā chuke the to wuh bhī gayā, agarche alāniyā nahīñ balki khufiyā taur par. Yahūdī id ke mauqe par use talāsh kar rahe the. Wuh pūchhte rahe, “Wuh ādmī kahāñ hai?”

Hujūm meñ se kāī log Īsā ke bāre meñ burburā rahe the. Bāz ne kahā, “Wuh achchhā bandā hai.” Lekin dūsroñ ne etarāz kiyā, “Nahīñ, wuh awām ko bahkātā hai.” Lekin kisī ne bhī

us ke bāre meñ khulkar bāt na kī, kyoñki wuh Yahūdiyoñ se ÷arte the.

Īd kā ādhā hissā guzar chukā thā jab Īsā Baitul-muqaddas meñ jākar tālīm dene lagā. Use sunkar Yahūdī hairatzadā hue aur kahā, “Yih ādmī kis tarah itnā ilm rakhtā hai hālāñki is ne kahīñ se bhī tālīm hāsil nahīñ kī!”

Īsā ne jawāb diyā, “Jo tālīm main detā hūñ wuh merī apnī nahīñ balki uskī hai jis ne mujhe bhejā. Jo uskī marzī pūrī karne ke lie taiyār hai wuh jān legā ki merī tālīm Allāh kī taraf se hai yā ki merī apnī taraf se. Jo apnī taraf se boltā hai wuh apnī hī izzat chāhtā hai. Lekin jo apne bhejne wāle kī izzat-o-jalāl baḥāne kī koshish kartā hai wuh sachchā hai aur us meñ nārāstī nahīñ hai. Kyā Mūsā ne tum ko shariyat nahīñ dī? To phir tum mujhe qatl karne kī koshish kyoñ kar rahe ho?”

Hujūm ne jawāb diyā, “Tum kisī badrūh kī girift meñ ho. Kaun tumheñ qatl karne kī koshish kar rahā hai?”

Īsā ne un se kahā, “Mainne Sabat ke din ek hī mojizā kiyā aur tum sab hairatzadā hue. Lekin tum bhī Sabat ke din kām karte ho. Tum us din apne bachchoñ kā ḡhatnā karwāte ho. Aur yih rasm Mūsā kī shariyat ke mutābiq hī hai, agarche yih Mūsā se nahīñ balki hamāre bāpdādā Ibrāhīm, Is’hāq aur Yāqūb se shurū huī. Kyonki shariyat ke mutābiq lāzim hai ki bachche kā ḡhatnā āṡhweñ din karwāyā jāe, aur agar yih din Sabat ho to tum phir bhī apne bachche kā ḡhatnā karwāte ho tāki shariyat kī ḡhilāfwarzī na ho jāe. To phir tum mujh se kyon nārāz ho ki mainne Sabat ke din ek ādmī ke pūre jism ko shafā dī? Zāhirī sūrat kī binā par faislā na karo balki bātinī hālat pahchānkar muñsifānā faislā karo.”

Us waqt Yarūshalam ke kuchh rahne wāle kahne lage, “Kyā yih wuh ādmī nahīn hai jise log qatl karne kī koshish kar rahe haiñ? Tāham wuh yahān khulkar bāt kar rahā hai aur koī bhī use rokne kī koshish nahīn kar rahā. Kyā hamāre rāhnumāoñ ne haqīqat meñ jān liyā hai ki yih Masīh hai? Lekin jab Masīh āegā to kisī ko bhī mālūm nahīn hogā ki wuh kahān se hai. Yih ādmī farq hai. Ham to jānte haiñ ki yih kahān se hai.”

Īsā Baitul-muqaddas meñ tālīm de rahā thā. Ab wuh pukār uṭhā, “Tum mujhe jānte ho aur yih bhī jānte ho ki main kahān se hūñ. Lekin main apnī taraf se nahīn āyā. Jis ne mujhe bhejā hai wuh sachchā hai aur use tum nahīn jānte. Lekin main use jāntā hūñ, kyoñki main uskī taraf se hūñ aur us ne mujhe bhejā hai.”

Tab unhoñ ne use giriftār karne kī koshish kī. Lekin koī bhī us ko hāth na lagā sakā, kyoñki abhī uskā waqt nahīn āyā thā. To bhī hujūm

ke kaī log us par īmān lāe, kyoñki unhoñ ne kahā, “Jab Masīh āegā to kyā wuh is ādmī se zyādā ilāhī nishān dikhāegā?”

Farīsiyoñ ne dekhā ki hujūm meñ is qism kī bāteñ dhīmī dhīmī āwāz ke sāth phail rahī haiñ. Chunāñche unhoñ ne rāhnumā imāmoñ ke sāth milkar Baitul-muqaddas ke pahredār Īsā ko giriftār karne ke lie bheje. Lekin Īsā ne kahā, “Maiñ sirf thoṛī der aur tumhāre sāth rahūngā, phir maiñ us ke pās wāpas chalā jāūngā jis ne mujhe bhejā hai. Us waqt tum mujhe ḍhūṅḍoge, magar nahīñ pāoge, kyoñki jahāñ maiñ hūñ wahāñ tum nahīñ ā sakte.”

Yahūdī āpas meñ kahne lage, “Yih kahāñ jānā chāhtā hai jahāñ ham use nahīñ pā sakeñge? Kyā wuh bairūn-e-mulk jānā chāhtā hai, wahāñ jahāñ hamāre log Yūnāniyoñ meñ bikhrī hālat meñ rahte haiñ? Kyā wuh Yūnāniyoñ ko tālīm denā chāhtā hai? Matlab

kyā hai jab wuh kahtā hai, ‘Tum mujhe
ḍhūṇḍoge magar nahīn pāoge’ aur ‘Jahān
maiñ hūñ wahān tum nahīn ā sakte’.”